

NEWSPAPER CLIPPING

Date	15 Ogos 2012
Title	Uniten tawar Kejuruteraan Tahfiz
Publication	Sinar Harian
Page	Khabar Kampus

Uniten tawar Kejuruteraan Tahfiz

NORHIDAYYU ZAINAL
norhidayyu@sinarharian.com.my

UNIVERSITI Tenaga Nasional (Uniten) melakukan satu anjakan paradigma dengan memperkenalkan Program Kejuruteraan Tahfiz, bersepadu kurikulum akademik dan tahfiz al-Quran.

Naib Canselornya, Datuk Seri Profesor Mashkuri Yaacob berkata, seramai 21 pelajar menerima kemasukan pertama bagi semester satu 2012/2013 dan mendapat tajaan penuh daripada Tabung Amanah Zakat Uniten (Tazu) dan Majlis Amanah Rakyat (Mara).

"Program lima tahun ini merangkumi pengajian tahfiz dan asas kejuruteraan selama setahun, kemudiannya diikuti program Ijazah

Sarjana Muda Kejuruteraan Mekanikal dan Diploma Tahfiz selama empat tahun yang berjalan serentak.

"Program tahfiz adalah satu inisiatif Uniten dalam usaha melahirkan generasi Muslim profesional," katanya pada Sinar Harian pada Majlis Iftar Perdana Uniten 2012, baru-baru ini.

Menurutnya, Tazu sejak dilantik oleh Lembaga Zakat Selangor (LZS) sebagai Penolong Amil telah berjaya mengutip zakat sebanyak RM2,994,917.75.

"Daripada kutipan ini, pihak Uniten telah menerima upah sebagai Penolong Amil sebanyak RM147,939.48 yang digunakan bagi menggerakkan operasi pentadbiran Tazu," katanya.

Menurutnya, daripada operasi kutipan ini, Tazu telah menerima wang

agihan semula sebanyak RM690,384.25 yang telah berjaya diagihkan kepada 550 pelajar dan anggota kerja Uniten yang tergolong dalam asnaf fakir, miskin, muallaf dan fisabilillah dengan jumlah keseluruhan agihan zakat sebanyak RM504,466.69.

Dalam pada itu, Uniten juga telah menjalankan tanggungjawab sosial korporat (CSR) dengan memberi fokus pada golongan ibu tunggal yang kurang upaya, tidak bekerja, tidak berkemampuan, menanggung anak atau cucu serta tidak menerima bantuan kewangan daripada mana-mana pihak.

"Pada tahun ini, lima keluarga ibu tunggal dan miskin dari sekitar kawasan Bangi telah dipilih untuk menerima sumbangan," katanya.



Mashkuri (kiri) menyampaikan sumbangan kepada ibu tunggal.